



UNIVERSITI
TEKNOLOGI
MARA

Cawangan Negeri Sembilan
Kampus Rembau

2024

RONA TINTA

e-BULETIN
EDISI
2024

FAKULTI PENGURUSAN & PERNIAGAAN
UNIVERSITI TEKNOLOGI MARA
CAWANGAN NEGERI SEMBILAN, KAMPUS REMBAU



CHIEF EDITOR
SYAZLIANA KASIM

EDITORS
FARRAH OTHMAN
NOOR AZILLAH MOHAMAD ALI
SHAHRUL AMRI AB WAHAB
DR. HAFIZ ALI, M.

eISSN 2785-9126



9 772 785 912 007





MANFAATKAN PENINGKATAN GAJI: MENABUNG UNTUK MASA HADAPAN DAN KECEMASAN

FAKRULNIZAM JAFRI

Peningkatan gaji adalah berita baik bagi setiap pekerja. Ia sering dianggap sebagai pengiktirafan terhadap usaha keras dan pencapaian dalam kerjaya. Namun, walaupun kenaikan gaji dapat memberikan manfaat jangka pendek, ia juga membuka peluang untuk perancangan kewangan yang lebih strategik. Dalam dunia yang sentiasa berubah dan penuh mencabar kini, kemampuan dalam menguruskan sumber kewangan secara bijak menjadi semakin penting, lebih-lebih lagi apabila gaji seseorang meningkat.

Namun begitu, berita berkenaan peningkatan gaji dalam kalangan kakitangan awam di Malaysia disambut penuh syukur, kebanyakan orang mungkin mudah tergoda untuk meningkatkan perbelanjaan mereka, berkira-kira untuk mula membeli barangan mewah, atau menambah hutang. Ini bakal mengakibatkan ketidakstabilan kewangan jika tidak dikendalikan dengan terbaik.

Meningkatnya pendapatan bulanan adalah merupakan suatu peluang yang harus tidak perlu disia-siakan sebaliknya perlu digunakan dengan sebaik mungkin, bukan

sahaja untuk meningkatkan gaya hidup, tetapi juga untuk memastikan kewangan kekal stabil, terutama dalam menghadapi waktu-waktu kesukaran serta kecemasan yang tidak dijangka. Oleh itu, adalah sangat penting untuk menabung dari pendapatan bulanan agar apabila kecemasan berlaku, ada simpanan yang boleh digunakan tanpa perlu memikirkan tentang bebanan hutang.

Peningkatan Gaji: Berkat atau Bebanan?

Peningkatan gaji pastinya membawa kegembiraan. Ia boleh memberikan seseorang kebebasan kewangan yang lebih baik dan kemampuan untuk mendapatkan apa yang mereka idamkan selama ini. Walau bagaimanapun, peningkatan gaji juga boleh menjadi pedang bermata dua jika tidak diuruskan dengan bijak.

Sebahagian besar individu, apabila mendapat peningkatan gaji, cenderung untuk menyesuaikan gaya hidup mereka mengikut pendapatan yang lebih tinggi. Ini dikenali sebagai inflasi gaya hidup yang mana perbelanjaan bertambah seiring dengan peningkatan pendapatan. Jika seseorang tidak berhati-hati, walaupun gaji meningkat, mereka masih mungkin merasa kesulitan kewangan kerana tidak ada simpanan atau perbelanjaan mereka terus meningkat.

Menabung adalah salah satu cara paling berkesan untuk mengatasi masalah ini. Dengan disiplin yang betul, seseorang dapat menggunakan peningkatan gaji mereka untuk membina tabungan kecemasan, melabur untuk masa depan, dan mencapai matlamat kewangan yang lebih besar.




Gambar 1: Perancangan perbelanjaan adalah penting.

Kepentingan Menabung untuk Kecemasan

Kecemasan kewangan boleh datang dalam pelbagai bentuk: kehilangan pekerjaan secara tiba-tiba, penyakit atau kemalangan, kerosakan besar pada rumah atau kenderaan, atau bahkan pandemik global seperti COVID-19. Situasi ini tidak boleh diramalkan, dan mereka boleh menyebabkan tekanan kewangan yang serius jika seseorang tidak bersedia.

Simpanan kecemasan adalah pelampung kewangan yang dapat memberikan sokongan apabila keadaan menjadi sukar. Pakar kewangan sering menyarankan agar kita mempunyai simpanan kecemasan yang cukup untuk menampung tiga hingga enam bulan perbelanjaan harian. Ini bermakna simpanan ini dapat membantu anda terus hidup dan membayar bil tanpa perlu segera mencari pekerjaan baru atau meminjam wang dengan kadar faedah yang tinggi.

Simpanan kecemasan bukanlah untuk digunakan sewenang-wenangnya; ia perlu disimpan dan hanya digunakan apabila benar-benar diperlukan. Mempunyai simpanan ini memberikan ketenangan fikiran dan kebebasan dari kebimbangan kewangan yang berlebihan apabila menghadapi situasi tak terduga.



Gambar 2: Pelaburan untuk simpanan jangka masa panjang.

Kesimpulannya, meningkatnya gaji adalah peluang besar untuk meningkatkan kestabilan kewangan, bukan sekadar untuk menikmati gaya hidup yang lebih mewah. Dengan menabung sebahagian daripada pendapatan bulanan, seseorang dapat bersiap sedia menghadapi keadaan kecemasan tanpa menambah beban hutang. Disiplin dalam

menguruskan kewangan, seperti membuat bajet, melunaskan hutang, dan melabur, adalah kunci untuk membina simpanan yang kukuh. Tabungan kecemasan bukan sahaja memberikan ketenangan fikiran tetapi juga kebebasan kewangan yang lebih besar serta jaminan keselamatan untuk masa depan yang tidak menentu.

Rujukan

Ayoup, H., Sawandi, N., Abdullah, Z., Jaffri, R.A. & Yu, T.C. (2006). *Duit banyak bertambah banyak*. Malaysia: PTS Professional Publishing.

Shafie, M.Z. (2015). *Zero Hutang*. Selangor, Malaysia: Galeri Ilmu.